

Dîyì Dya Nzambi Ndilwe Kudi Muprofeta
William Marrion Branham

**“Nyuma Miseswishi Ilwishangana
Ne Dîyì Dya Nzambi”**

Wêwè kupiishi mwenji wa mpekaatu to. Umuumvwile luse. Mulekela atungunuke ne kukoka kwende kwa cishiba cya mfwanka, mulekela anwe maluvu ende makole, mulekela ěnzè manaya ende a twarta. Aci ke cyende cintu cidì ciumumusha luteetuku. Kumubiipishi nansha. Padiye upingana kumbelu kwende ne bikwabo, mucyoke ne muzengele, yêyè udi dijinga ne cintu cidì mwa kuumumusha luteetuku. Cintu cyûdì wêwè ne cya kwenza, nkwikala ne nsombelu wa cijila bwa wamona mwa kumutwisha ne, Evanjeeliyo utu ukwatangana misangu binunu dikumi kupita bilele abi. [Katupa kaa mukaba wa mêtì kashaale munda mutupu—Muf.] Nenku yêyè mufwe mu mushindu awu, neaye mu Iferno, mwikale mu maluvu makole awu. Aci’s mmulùngù wa dyabulu’s. Yêyè mufwe mwikale ukoka cishiba cyende cya kalekale cya mfwanka aci, Nzambi ke Mumulumbulwishi. Yêyè mufwe, upatuka mu mwaba ewu, mu dija dya maja, ne mu dinyeemakana waya eku waya eku mwikale muvwale bilàmbà bya bundu, Nzambi ke Mumulumbulwishi.

Kadi kudi cintu cimwepele: wêwè mufwe mu Bukole bwa dilaabiibwa dya Nyuma Mwîmpè, bu mwakafwa Stefano paakatangilaye muulu mu mpala mwa Nzambi, kwambaye ne: “Ndi mmona Dyulu dyunzulula, ne Yesu mwimane ku diboko dya balume,” wêwè s’uyaaya mutangile ku Dyulu, anu mudi kandindi kaya katangile ku diswa dyaku. Amen.

Nyuma miseswishi ilwishangana ne Dîyì dya Nzambi! Lekelela, lekela biye. “Udi ubyenza bishi’s, Mwanetu Branham?” Lekela cyanaana biye. Ke cyònsò cyûdì ne

cya kwenza. Angata Dîyî dya Nzambi. Kuditacishi bwa kukwatakaja cintu nansha cimwe to. Kuyi katwa binu ku cyoshelu, ukutuuta bintu, wela mbila ya isaamisha mutu, ne: “Nzambi, mpe Nyuma Mwîmpè! Mukalenge, mpe Nyuma Mwîmpè!” Yêyè kaakulwa kûdî bwa dituuta dyebe dya bintu ku cyoshelu adi nansha. Aci kaciyena ne cidici cikupeteshana nansha. To. Awu kî mmushindu utuye Yêyè ulwa nansha. Mpa kuMukwata ku Dîyî Dyende!

Tangila Peetelo. Peetelo uvwa mu bwalu bukole, byenze anu bu ne uvwa mwa kufwa. Nenku kumonaye Mukalenge ulwa, wenda wendela pa mâyi. Ke yêyè kwamba ne: “Mukalenge, piikalabi ne ng’Wêwè, amba dîyî bwa mêmè ndwe.”

Ke Mukalenge kwambaye ne: “Lwâkù.”

Mpindyewu, Peetelo wakamba ne: “Mpindyewu, Mukalenge, anji indilabi kakese tûng, ndekela ngênzè dijila dya byakudya dya matuku makumi anaayi, bwa mmone ne ndi mwa kwendela pa mâyi apu anyi cyêna mwa kwendelapu. Kaa Mukalenge, ndekela mpete Nyuma bûngî bukumbane pambidi paanyi bwa mmone mwa kuja maja mu Nyuma ne kwakula mu myakulu, mu bwatu emu, pashiishe mmone mwa kumupatuka”? To, mukwetu! Yêyè wakakwata Nzambi ku Dîyî dyende, wakalekelela ne wakalekela bintu biya. Nzambi wakamufikisha kundekeelu.

Amba tûng bu ne Nzambi uvwa mupetangane ne Môsà, kumwambilaye ne: “Môsà, pweka mu Ejipitu mwamwa, wambile Pâlò ne: ‘Lekela bantu Baanyi baye’”? Amba tûng bu Môsà mwambe ne: “Nzambi, anji ndekela ngênzè dijila dya byakudya dya matuku makumi anaayi, bwa mmone ne ndi ne diitabuuya dikumbane bwa kukutumikila, Wêwè Nzambi. Mukalenge, mpe cintu kampana, ne cintu kampana cikwabo. Lekela nkwambile bwalu, anji ndekela mmone ne ndi mbwela mu Nyuma”? Môsà kaakeela nkonko nansha, wakakwata anu Nzambi ku Dîyî Dyende, ne

wakaya. Mushindu awu ke ûdî wêwè ne cya kwenza bwalu abu, kukwata Nzambi ku Dîyî Dyende. Ke pawashiisha kumanya ne udi mukumbane mwa kwenza bwalu abu. Yêyè kaakindila too ne pavwa cintu kampanda cikwabo mwa kwenzeka nansha, yêyè wakaya anu cyanaana e kubwenzaye.

Twambe bishi bwa Eliya, paakatuulukaye ku Mukuna wa Kaameele, bu mukaavwaye kwine kuulu kwaka ntanta mule? Ke kupetanganaye ne mukaji mukamba mupele, mununu. Yêyè ewu uvwa...Uvwa mwenyi, wa baa Bisamba bya Bende. Nenu paakapetanganaye nende kuntwaku, mwikale munkaci mwa dyangula tukunyi, mu budimi. Ke Nzambi kumwambilaye ne: “Pweka kwa mukaji mukamba kwaka.” Mwaba kaayipu bwa muyiishi kuyaye’s we!

Ke yêyè awu wenda upweka mutangile kwaka kwa mukaji mukamba. Nenu paakenzaye nanku, mukaji wakangula tukunyi tubidi. Ke yêyè ne: “Cyûdi wenza ncinyi?”

Yêyè ne: “Ndi ngangula tukunyi. Ndi anu ne tukula tukese tukumbane bwa kwenza tuumâmpà tubidi twa bukula bwa nsêke. Ke twônsò tudi tunshaadile. Kukaadi bidimu bisatu bitudi katuyi bapete mvula nansha kamata.” Yêyè ne: “Ke pândî nya bwa kwenza tuumâmpà etu twa bukula bwa nsêke. Nenu mêmè ne mwanaanyi wa balume tutudye, kadi tufwe.”

Yêyè kwamba ne: “Anji ngenzela mêmè kamwepele dyambedi!” Aleluuyah! Kaa, ndi—ndi mumanye ne, ntu ne ndambu wa dipaala, kadi nansha nanku, ndi luseke lwa Mukalenge. Ke kwambaye ne: “Anji ngenzela mêmè kamwepele dyambedi. Bwalu, EMU MMUDI MUKALENGE WAMBA.” Ke bwalu abu’s.

Ncinyi ciine aci? “Anji kebaayi dyambedi Bukalenge bwa Nzambi ne bwakane Bwende.” Pa kuumusha bya ne, Bukalenge bwa Nzambi ne “ndambu wa mutooyi” to; pa

kuumusha bya ne, Bukalenge bwa Nzambi ne “ndambu wa disaluka” to; pa kuumusha bya ne, Bukalenge bwa Nzambi ne “ndambu wa *bikampanda* ne *bikansanga*” to. Kadi: “Nzambi, mu bwakane Bwende Yêyè, pashiishe bintu bikwabo byônsò ebi nebanupebi bu nsakidilu.” Anji teeka dyambedi!

Mpindyewu, pashiishe tuvwa mwa kwikala bumvwe cyoci aci. “Diitabuujja didi difuma ku dyumvwa, dyumvwa dya Dîyî.” Yêyè ne: “Ke Dîyî dya Mukalenge ndyodi adi, bwalu yêyè ewu mmuntu wa cijila wa Nzambi. Mmuprofeta wa Nzambi, nenku ndi mumanye ne mbulelela. Nenku Dîyî dya Nzambi ndyodi adi.”

Mpindyewu, yêyè kaakanyeemakana waya eku waya eku bwa kukonka beena mutumba mushindu wa kwenzaye bwalu abu nansha. Kaakajinga bwa kuya kaabanyangana bwende . . . ne kwambila beena mutumba, wamba ne: “Mpindyewu, nudi nwela peenu meeji bishi? Muyiishi nyewu udi kwanyi eku mwikale wamba *cikampanda*. Susie, udi wela peebe meeji bishi pa *cikampanda* eci?”

Yêyè wakabwela, wakabanga kupatula bivwaye naabi. Ke yêyè kulekelela. Wakalekelela bivwaye naabi, bwa wamona mwa kubipeta bipite apu. Ke cidi cikengela baa pa buloba leelu wa ndaaya ewu, mmushindu wa kalekale wa dilekelela byudi naabi. Aleluuyah! Ke yêyè kupatula bivwaye naabi, bwa kumona mwa kuujibwaye. Wakapatula maanyi ônsò avwaye nawu, ne maanyi ônsò avwaye nawu ne tukula twônsò tuvwaye naatu, ubifila kudi muyiishi, ubipa Bukalenge bwa Nzambi. Nenku paakapatulaye byônsò mwômò amu, ke Nzambi kupwekaye, kuujaye cipanza cya bukula, kuujaye kanyingu kaa maanyi. Wakabipumwina kabidi mu dilongo dya muyiishi. Ne Yêyè wakapweka, e kubyuja cyakabidi. Wakapumwinamu. Misangu yônsò ivwaye anu upumuna, Yêyè pende uvwa anu uuja.

Nengâmbè leelu ewu ne, bu bantu mwa kupatula lukutukutu lwônsò elu lwa dyanza dya maalu a macimbu ne

diidikija dya bwena Kilisto edi, ne bu bôbô mwa kushiila Nyuma Mwîmpè bwa kwangataye kaaba kaa bintu abi, nekujuuke ditabuluja mu masangu a mîsèèsù ya Eighth ne Penn Street diikala mwa kutangalaka too ne mu ditunga dijima. Lekela lukutukutu, pingana ku Dîyî dya Nzambi. Patula bidi mu wêwè abi, bwa wamona mwa kuujiibwa. Lekelela bintu biye, nenku Nzambi nealekelele bintu bwa bilwe. Patula bidi mu wêwè abi, nenku Nzambi neùjè. Tuntu twônso tudi katuyi ne mushinga: “Bidi bikengela wênzè *cikampanda* ne bidi bikengela wênzè *cikansanga*, bivwa bikengela bwa wêwè kwenza *cikampanda*, bivwa bikengela bwa wêwè kwenza *cikansanga*.” Bipwa mwoyi! Bipatule mu musuuka webe!

Amba ne: “Nzambi, enza bwa ne, kubangila dituku edi. . . dijima, ngiikale webe Wêwè, mêmè yônso. Mukalenge, nyewu ndwa ne mwoyi mucibuluke. Nyewu ndwa ne nyuma munyongame. Ndi muKunange, ne Wêwè s’udi mumanye ne ndi muKunange. Nenku ndi muswe kupwa mwoyi budingidingi bwônso ebu bwa byônso bya dijila dya byakudya dya matuku makumi anaayi bwa mmone ne ndi mwa kutamba kuseemena pabwipi ne Nzambi, ne byônso bya *bikampanda*, *bikansanga*, ne *bikankenga*, lukutukutu lwônso elu.”

Imanyika bintu abi! Kakwena cintu nansha cimwe mu Dîyî cidi cikwambila bwa kwenza dijila dya byakudya matuku makumi anaayi nansha. Nansha cimwe. Pa buloba bujima kakwena cintu nansha cimwe cidi cikwambila bwa kujila byakudya to, amba anu Nzambi Yêyè mukwambile. Piinaapu, wêwè mujile byakudya, kwakuumvwa nzala ikusuma to, neujile bintu byônso ebi. Paudi mu dijila dya byakudya, mwaneetu wa balume, newikale ne disanka ne musangeelu dîbà dyônso. Mbambe ne: “Kanumweki kumpala kwa bantu mùtù beena lubombo benza nansha, ne kwîsù bu kudi kwamba bwalu, kubungame: ‘Mêmè ndi mu dijila dya

byakudya dya matuku makumi anaayi. Byakudya bya mu aanyi malongo kabyakunkumbana kabidi to. Ndi mujimije kilô mitwe ku dikumi ne itaanu, kadi mbangambile ne mvwa ne mmwenekelu mwîmpè kupita paanyima paa byôbî ebi bimane kujika.” Kaa, lukutukutu naanyi we! Aci’s nnyuma miseeswishi ya dyabulu.

Ujuuka ku cyoshelu, mwikale wamba ne “butumbi, butumbi, butumbi” too ne paudi upangila bukole bwa kwamba kabidi kantu kakwabo nansha kamwe, wamba ne: “Bikengela wakule mu myakulu kumpala kwa wêwè kupeta Nyuma Mwîmpè.” Lukutukutu naanyi we! Lupatule!

Patula cintu aci mu ndongolwelu webe ne lwâku wimanyine pa Diyî dya Nzambi! Yêyè mmwambe ne: “Nyingalalaayi, muntu ne muntu, ne batijibwaayi mu Dînà dya Yesu Kilisto bwa dilekediibwa dya mpekaatu yenu, nenku nenwagate kupà kwa Nyuma Mwîmpè.” Nzambi Yêyè kayi mushaale mukwate ku Diyî Dyende, kêna Nzambi nansha. Amen. Patula bidi mu wêwè abi. Ujiibwa. Amen. Yoyöyò! Ke cindi munange aci. S’ke Diyî Dyende adi. Ke mudi Nzambi mwambe. Mmwômò. Nenku padi Nzambi mucyâmbè, Yêyè Nzambi ke watangila bwalu bwaci. Bîmpè be. Byônsò byudi wenza bwa kudilongolola abi, diya dyônsò dyudi mwa kuya mu ekeleziya . . .

Bidi anu bu lwa kunshi eku ku midimu ya dyenza dya mashinyi kudibo balamakaja mushiki munene wa bintu bya dyambula, anyi mushiki munene wa mashinyi a dyambulangana nawu. Mêmè mvwa ne ciibidilu cya kwenza mudimu kwôko aku. Nenku badi bangata ne balamakaja makaadika abo manene ne bikwabo, beelaku mabaya mashile, bamane kulengeja ne mabaya a mucu acajou ku nyungulwilu kwônsò, ne bintu byônsò bidi bîmpè kumona, baateeka pa njanja paapa, kadi miikale mafwe anu bu mudi musônsò wetu wa ku ciibi ewu. Mutu wa majuwa mwimane paapa, kawuyi ne luuya munda mwawu. Mmusombe anu mwaba awu’s.

Cidi cikengediibwa leelu ewu nndambu wa mudilu mu lwesu lwa mudilu mukole. Cidi cikengediibwa leelu ewu nndambu wa luuya. Cidi cikengediibwa leelu ewu, ekeleeziya, bwa kusabisha; cintu cya mudilu mutambe bukole cidiku bwa kusabisha ne kwipata mpekaatu mu nsombelu webe, ndinanga. Nenku nwenu kanuyi banangangane munkaci mwenu, nenunange Nzambi unudi kanuyi bamone bishi? Dinanga ditu disokoka mushiki mujima wa mpekaatu. Bwelaayi mu dinanga ne Nzambi, nenku nenunangangane munkaci mwenu, nenku nenunange ekeleeziya, nenunange Cintu ciine kunudi badifile, nenunange cintu cyônsò cidi cya cijila, ne nenuseemene kule ne maalu a pa buloba.

Nyuma miseeswishi miikale inyunguluka eku ne eku yenda yambila bantu *bikampanda*, *bikansanga* anyi *bikankenga* ne: “Bikengela bēnzè *bikampanda*. Bikengela bēnzè *bikansanga*.” Aci mbwa padi mangumba majuuke, nenku miikale mapete ndambu wa dibuulula, miikale amba ne: “Ee, mpindyewu, mēmè ndi ngitabuuja ne, muntu... mēmè ndi ngitabuuja cintu bu mudi kwela kwa mbila, mu Bible.” Mmwômò. Aci mbulelela. Ke bôbò kwibaka dingumba diimanyine pa bwalu abu ne: “Wêwè mwele mbila, wâMupecì.” Kadi kwena anu muMupete to.

Dikwabo didi dijuuka pashiishe, dyamba ne: “Kwakula kwa mu myakulu.” Mmwômò. Aci cidi mu Bible. “Kadi paudi wakula mu myakulu, wâMupecì.” Kadi bààbûngì baabo baakaakula mu myakulu kadi kabayi anu baMupete to. Nudi bumvwe anyi? Kabyena nanku nansha. To, mukwetu.

Bààbûngì baabo baakamba ne: “Ee, bidi bikengela twambe mēyì a ciprofeta.”

Tangilaayi baprofeta aba bavwa ne nsengu ku mitu, batupika babanda bapweka benda bamba mēyì a ciprofeta. Ke Miika kwamba ne: “Nwenu bônso, muntu ne muntu, nudi nushima.” Amen. Mmwômò. Nzambi katu muswe

bya nanku nansha. Nzambi Yêyè utu ulwa kudi mwoyi mujaalame udi mwikale ulwa ne nyuma munyongame, mucibuluke. “Ewu udi uya ne kumyamina ne binsonji, kamuyi mpata, neapingane wenda usanka, mwambule myepu ya mushinga mukole.” Amen. Longolola bwalu abu’s, mulunda wanyi.

(Byangata mu *Nyuma Miseeswishi*, dya 24.07.1955)

CILUBA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org